

Nunaqarfigisami radioqarfinnut tv-qarfinnullu il.il. tapiissutit pillugit Namminersornerullutik Oqartussat nalunaarutaat

Radiukkut tv-kkullu aallakaatitsisarneq pillugu Inatsisartut peqqussutaanni nr. 6, 14. november 2004-meersumi § 39, imm. 2 aamma § 42, imm. 1 aamma 2, aamma § 59, imm. 2 aamma 3 naapertorlugit aalajangersarneqarput:

Tapiissutit il.il.

§ 1. Naalakkersuisut nunaqarfigisami radiukkut tv-kkullu aallakaatitsisarnermut tapiissutinik, aningaasanut inatsimmi tassunga aningaasaliissutitut immikkoortinneqarsimasunit tunniussisassapput.

§ 2. Nunaqarfigisami radiukkut tv-kullu aallakaatitsisarnermut aningaasatigut tapiissutit imatut tunniunneqarsinnaapput:

1) Tunngaviusumik tapiissutit nunaqarfigisami radioqarfiit tv-qarfillu ingerlanneqarnerannut tunniunneqartartut.

2) Aallakaatitassiornissamut tapiissutit nunaqarfigisami tv-qarfinnuinnaq tunniunneqartartut.

3) Kattuffimmut tapiissutit sinerissami takusassiiviit tusagassiivillu kattuffiata (STTK-p) ingerlanneqarneranut tunniunneqartartut.

4) Nunaqarfigisami radioqarfiit tv-qarfillu sulisuisa ilinniarteqqinneqartarnerannut ingerlaqqiffiusumillu ilinniartinneqarnerannut tapiissutit.

Imm. 2. Tunngaviusumik tapiissutit, tak. imm. 1, nr. 1, aamma aallakaatitassiornissamut tapiissutit, tak. imm. 1, nr. 2, qinnuteqartoqarneratigut tunniunneqarsinnaapput.

Imm. 3. Tapiissutinik qinnuteqartoqarnerani, tak. imm. 2, tapiissutinik agguasartuusut, tak. §§-it 4 aamma 13, nalilissavaat aallakaatitsivik nammineerluni namminerisamillu aallakaatitassiortarluni ingerlanersoq.

Tapiissutit agguataarnerat

§ 3. Aningaasaliissutinit § 1-imi taaneqartunit 400.000 kr.-it kattuffimmut tapiissutitut immikkoortinneqariissapput, tak. § 2, imm. 1, nr. 3.

Imm. 2. Aningaasaliissutinit § 1-imi taaneqartunit 100.000 kr.-it nunaqarfigisami radioqarfiit tv-qarfillu sulisuisa ilinniarteqqinneqartarnerannut ingerlaqqiffiusumillu ilinniartinneqarnerannut tapiissutitut immikkoortinneqariissapput, tak. § 2, imm. 1, nr. 4.

Imm. 3. Aningaasaliissutit sinnerinit pingajorarterutit marluk (2/3-it) tunngaviusumik tapiissutitut, tak. § 2, imm. 1, nr. 1, pingajorarterutillu (1/3-it) aallakaatitassiornissamut tapiissutitut, tak. § 2, imm. 1, nr. 2, atorneqassapput.

Tunngaviusumik tapiissutit

§ 4. Tunngaviusumik tapiissutit STTK-mit aqunneqarlutillu tunniunneqartassapput. Tunniunneqarnerat kvartalimi qaammatip siulliup naannginnerani pisassaaq.

Imm. 2. Tapiissutit imm. 1-imi taaneqartut aqunneqarnerat tunniunneqartarnerallu kultureqarnermut pisorta qarfiup nakkutigissavaa.

§ 5. Tunngaviusumik tapiissutit STTK-p nunaqarfigisami aallakaatitsivinnut nutaanut marlunnut, tapiiffigineqarnissamut piumasaqaatinik naammassinninnermik kingorna kvartali tulliuuttooq aallarnerfigalugu tapiissutitik tunineqarsinnaasunut aningaasanik immikkoortitsererneratigut aningaasaliissutigineqartassapput.

Imm. 2. Nunaqarfigisami aallakaatitsiviit marlunnit amerlanerusut qinnuteqareernerikkut aningaasanik immikkoortinneqareersunik pisinnaappata, tak. imm. 1, aallakaatitsiviit marluk tunngaviusumik tapiissutitik tunineqarnissamut piumasaqaatinik naammassinneqqaartut kisimik tapiiffigineqassapput, tak. § 6, imm. 1-imiit 3-mut.

Imm. 3. STTK-p tunngaviusumik tapiissutit sinneri, tak. imm. 1, nunaqarfigisami radioqarfiit tv-qarfillu tapiiffigineqarsinnaasut sinnerinut assigiimmik agguataassavai.

§ 6. Piumasaqaatit radiukku tv-kkullu aallakaatitsisarneq pillugu peqqussummi taaneqartut saniatigut tunngaviusumik tapiissutitik tunineqarnissamut piumasaqaatit makkua naammassineqarsimassapput:

- 1) Tunngaviusumik tapiissutitik qinnuteqaat ukiumi qinnuteqaatip attuumassuteqarfigisaani kingusinnerpaamik ulloq 5. januar STTK-mit tiguneqareersimassaaq, taamaattorli tak. § 5, imm. 2.
- 2) STTK-p qaammatisiutit malillugit ukiumi qinnuteqaatip attuumassuteqarfigisaani missingersuutit kingusinnerpaamik ulloq 5. januar tigoreersimassavai. Missingersuutit siulersuisut siulittaasuannit siulersuisunilu ilaasortanit minnerpaamik marlunnit atsiorneqarsimassapput.
- 3) Qaammatisiutit malillugit ukiumi qaangiuttumi Namminersornerullutik Oqartussanit tapiissutit tamarmiusut minnerpaamik 150.000 kr.-iusimappata aammattaaq STTK-p qaammatisiutit malillugit ukiumi qinnuteqaatip attuumassuteqarfigisaani anguniakkatut iliuusissatullu pilersaarutit kingusinnerpaamik ulloq 5. januar tigoreersimassavai. Anguniakkatut iliuusissatullu pilersaarutit siulersuisut siulittaasuannit siulersuisunilu ilaasortanit minnerpaamik marlunnit atsiorneqarsimassapput.

Imm. 2. STTK-p tapiiffigineqarnissamik qinnuteqaatip kingusinnerpaamik tiguneqarsimaffissaa ilutigalugu piffissamut qinnuteqaatip attuumassuteqarfigisaanut missingersuutit nunaqarfigisami aallakaatitsivinnit nutaanit, tak. § 5, imm. 1 aamma 2, tigusiassavai. Missingersuutit siulersuisut siulittaasuannit siulersuisunilu ilaasortanit minnerpaamik marlunnit atsiorneqarsimassapput.

Imm. 3. Aallakaatitsisinnaanermut akuersissut inummut ataatsimut imaluunniit inunnut arlalinnut ataatsimoortunut tunniunneqarsimappat naatsorsuutit, missingersuutit aamma anguniakkatut iliuusissatullu pilersaarutit aallakaatitsisinnaanermut akuersissutip piginnittuanit imaluunniit piginnittuinit atsiorneqarsimassapput.

Imm. 4. Radioqarfiit tv-qarfillu STTK-mut ilaasortaanngitsut paasissutissat imm. 1, nr. 2-miit 3-mut kiisalu imm. 2-miit 3-mut taaneqartut, piffissarititat piumasaqaatillu allanut atuuttut malillugit kultureqarnermut pisorta qarfiimmu nassiutissavaat.

§ 7. Tunngaviusumik tapiissutitik tunineqarnissami piumasaqaatit makku atuupput:

- 1) Aallakaatitsiviup siulersuisuisa, qaammatisiutit malillugit ukioq qaangiuttoq pillugu ukiumoortumik nalunaarutaat STTK-p kingusinnerpaamik ulloq 1. juni tigoreersimassavaa. Ukiumoortumik nalunaarut siulersuisunit tamarmiusunit atsiorneqarsimassaaq, taamaattorli tak. imm. 4.

2) Aallakaatitsiviup, qaammatisiutit malillugit ukiumi qaangiuttumi ukiumoortumik naatsorsuutai STTK-p kingusinnerpaamik ulloq 1. juni tigoreersimassavai, taamaattorli tak. imm. 4.

3) STTK-p kingusinnerpaamik qaammatit ulluisa 5-ianni tigoreersimasassavaa aallakaatitsiviup tapiissutitik pissarsisartup qaammammi qaangiuttumi aallakaatissimasaasa allattorsimaffiat.

Aallakaatitassiat tamarmik, nunaqarfigisami nutaarsiassanut aallakaatitanullu innuttaasut oqaaseqarsinnaatitaaffigisaannut agguataakkat taaguutaat, minutsit amerlassusii, oqaatsit imarisaallu nalunaarneqartassapput. Aammattaaq qaammammi nammineerluni aallakaatitassiat tamarmiusut kiisalu nipilersuutit atorineqartut, pilerisaarutit aammalu satellit-tv -radiuluunniit atorineqarpata taakku minutsinngorlugit nalunaarneqartassapput.

Imm. 2. Qaammatisiutit malillugit ukiumi qaangiuttumi Namminersornerullutik Oqartussanit tapiissutit tamarmiusut minnerpaamik 150.000 kr.-iusimappata naatsorsuutit kukkunerisiusumit nalunaarsorneqarsimasumit imaluunniit naalagaaffimmit akuerisaasumit kukkunerisiorneqarsimassapput. Naatsorsuutit aamma siulersuisunit tamarmiusunit akuerineqarsimallutillu atsiorneqarsimassapput aammalu kukkunerisiusut oqaaseqaataat ilanngunneqassapput. Ukiumi qaangiuttumi tapiissutit Namminersornerullutik Oqartussanit aningaasaliissutigineqarsimasut naatsorsuutini ersarissumik takuneqarsinnaassapput.

Imm. 3. Qaammatisiutit malillugit ukiumi qaangiuttumi Namminersornerullutik Oqartussanit tapiissutit tamarmiusut 150.000 kr.-init ikinnerusimappata naatsorsuutit nammineq kukkunerisiusorisamit imaluunniit kukkunerisiusumit nalunaarsorneqarsimasumit kukkunerisiorneqarsimassapput. Naatsorsuutit aamma siulersuisunit tamarmiusunit akuerineqarsimallutillu atsiorneqarsimassapput aammalu kukkunerisiusut oqaaseqaataat ilanngunneqassapput. Ukiumi qaangiuttumi tapiissutit Namminersornerullutik Oqartussanit aningaasaliissutigineqarsimasut naatsorsuutini ersarissumik takuneqarsinnaassapput.

Imm. 4. Aallakaatitsisinaanermut akuersissut inummut ataatsimut imaluunniit inunnut arlalinnut ataatsimoortunut tunniunneqarsimappat ukiumoortumik nalunaarut aamma naatsorsuutit aallakaatitsisinaanermut akuersissutip piginnittuanit imaluunniit piginnittuinit atsiorneqarsimassapput.

Imm. 5. Radioqarfiit tv-qarfillu STTK-mut ilaasortaanngitsut paasissutissat imm. 1-imiit 4-mut taaneqartut, piffissarititat piumasaqaatillu allanut atuuttut malillugit kultureqarnermut pisorta qarfimmu nassiutissavaat.

§ 8. Tunngaviusumik tapiissutitik tunineqarnissaq STTK-mut ilaasortaanissamik piumasaqaatitaqanngilaq.

Imm. 2. Tunngaviusumik tapiissutitik tunineqarnissamik piumasaqaataapput qinnuteqartup aallakaatitsisinaanermut akuersissummik atuuttumik peqarnissaa, aammalu qinnuteqartup radiukkut tv-kkulluunniit aallakaatitanik aallakaatitsisarnissaa.

§ 9. STTK-p tunngaviusumik tapiissutitik qinnuteqaat missingersuutilluunniit kvartalimi qaammatip siulliup ulluisa 5-iata kingorna aatsaat tigusimappagit, tunngaviusumik tapiissutitik aatsaat kvartalimi tulluuttumi tunniussisoqarsinnaavoq.

Imm. 2. STTK aallakaatitsiviup aallakaatissimasaasa allattorsimaffiannik tigusaqarsimanngippat, imaluunniit STTK-p kvartalikkaartumik nalunaarutaani allasimappat aallakaatitsivik aallakaatitanik aallakaatitsisimanngitsoq imaluunniit aallakaatitsivik tapiiffigineqarnissamut maleruagassanik allatigut ersarissumik unioqutitsisimasooq, taava aallakaatitsivik kvartalimi tulluuttumi tapiissutitik tunineqassanngilaq.

Imm. 3. Tapiissutitik tunineqarnissamut maleruagassanik unioqutitsisoqarpat, tak. § 6-imiit 7-imut,

imaluunniit tapiissutiniq pissarsisup tapiissutit aningaasaliissutigineqarneranni siunertaannit allaasunut atorsimappagit, STTK-p tapiissutiniq pissarsisartumut tunniussisarneq sukkulluunniit unitsissinnaavaa, tapiissutinillu tunniunneqarsimasunik tamakkiisumik ilaannakuusumilluunniit utertitsinissaq piumasarisinnaallugu.

Imm. 4. Aallakaatitsivik imm. 1-imiit 2-mut pineqartoq aatsaat tapiissutiniq pissarsisaleqqissinnaavoq § 6-imi piumasagaatit naammassisimaleqqikkunigit aammalu § 7-imi piumasagaatit eqquutsikkunigit.

Imm. 5. Tapiissutit tunniunneqanngitsoorsimasinnaasut tunniunneqassanngillat, kisiannili nunaqarfigisami radioqarfiit tv-qarfillu sulisuisa ilinniarteqqinneqartarnerannut ingerlaqqiffiusumillu ilinniartinneqarnerannut tapiissutitut immikkoortitanut nuunneqassallutik, tak. § 2, imm. 1, nr. 4

§ 10. Tunngaviusumik tapiissutiniq qinnuteqaammut itigartitsinerit, kiisalu tapiissutiniq tunniussisarnerup unitsinneqarnissaanik imaluunniit tapiissutiniq tunniunneqarsimasunik tamakkiisumik ilaannakuusumilluunniit utertitsinissamik § 9, imm. 2-miit 3-mut naapertorlugit aalajangiinerit, aalajangiinerup qinnuteqartumut nalunaarutigineqarneraniit sap.ak. 4-t qaangiutsinnagit kultureqarnermut pisortaqaarfimmut naammagittaalliutigineqarsinnaapput.

§ 11. STTK-p tunngaviusumik tapiissutitut atunngitsoorneqarsimasinnaasut nunaqarfigisami radioqarfiit tv-qarfillu sulisuisa ilinniarteqqinneqartarnerannut ingerlaqqiffiusumillu ilinniartinneqarnerannut tapiissutitut immikkoortitanut nuussavai, tak. § 2, imm. 1, nr. 4.

Aallakaatitassiornissamut tapiissutit

§ 12. Tunngaviusumik tapiissutit aallakaatitassiornissamut tapiissutiniq ilaneqarsinnaapput, taamaalillutik nunaqarfigisami tv-qarfiit aallakaatitassianut aallakaatitassianulluunniit tulleriiaartunut tapiiffigineqarnissamik qinnuteqarsinnaallutik.

§ 13. Aallakaatitassiornissamut tapiissutit Radio- tv-lu pillugit aalajangiisartunit aqunneqarlutillu tunniunneqartassapput. Tunniunneqarnerat aallakaatitsiviit ataasiakkaat nammineerlutik aallakaatitassiaat akuerisaasut nalunaquttap akunneranut agguataakkat, aallakaatitassiornissamut tapiissutitut aningaasaliissutigineqartunik kvartalinut 4-nut agguataakkanik agguarneri tunngavigalugit kvartalit tamarmik naanerisa kingorna pisassaaq.

Imm. 2. Kvartalimut qaangiuttumut tunngatillugu aallakaatitassiornissamut tapiissutiniq qinnuteqaat Radio- tv-lu pillugit aalajangiisartut kingusinnerpaamik ulluni 5. april, 5. juli, 5. oktober aamma 5. januar tigoreersimassavaat.

§ 14. Aallakaatitassiornissamut tapiissutiniq qinnuteqaat paasisutissanik makkuninnga imaqassaaq:

- 1) Aallakaatitassiap aallakaatitassialluunniit tulleriiaartut taaguutaat.
- 2) Aallakaatitsinerit amerlassusiat.
- 3) Aallakaatitat ataasiakkaat sivisussusiat.
- 4) Aallakaatitassiap aallakaatitassialluunniit tulleriiaartut tamakkiisumik aningaasalersorneqarnerat.
- 5) Aallakaatitassiap aallakaatitassialluunniit tulleriiaartut aallakaatitassianut makkununga agguataarlugit imarisaat: Meeqqanut inuusuttunullu aallakaatitassiaq, nutaarsiassanik soqutigintartunillu aallakaatitassiaq, inuiaqatigiit pillugit oqallinnermillu aallakaatitassiaq, timersorneq pillugu aallakaatitassiaq, kulturi pinngortitartu pillugit aallakaatitassiaq.
- 6) Aallakaatitassiornikkut sullikkumasat.
- 7) Suleqatigisimasinnaasat.

§ 15. Aallakaatitassiornissamut tapiissutit taamaallaat nunaqarfigisami tv-qarfiit nammineerlutik aallakaatitassiorneranni atugassatut tunniunneqarsinnaapput, taamaattorli tak. imm. 2-miit 4-mut.
Imm. 2. Aallakaatitassiornissamut tapiissutininik bingortitsinernut, angallanneq pillugu nalunaarutitut assigisaannullu atugassanik tunniussisoqarneq ajorpoq.

Imm. 3. Aallakaatitassiornissamut tapiissutininik piffissamut aallakaatitsivimmut, taamaallaat aallakaatitsiviup ilisarnaataanik, paasissutissiissutininik kaaviteruusaakkanik, tekst-tv-mik, aallakaateqqitanik, pilerisaarutininik, info-kanalinik taaneqartartunik taamaaqataannillu aallakaatitsinernik allanik imaqartumut atugassanik tunniussisoqarneq ajorpoq.

Imm. 4. Aallakaatitassiornissamut tapiissutininik assiliissutit aalajangersimasumut inissillugit, soorlu timersornernit imaluunniit naalagiarnernit aallakaatitsinissanut atugassanik tunniussisoqarneq ajorpoq.

§ 16. Aallakaatitassiornissamut tapiissutininik tunineqarnissaq STTK-mut ilaasortaanissamik piumasaqaatitaqanngilaq.

Imm. 2. Aallakaatitassiornissamut tapiissutininik tunineqarnissami piumasaqaataapput qinnuteqartup aallakaatitsinnaanermut akuersisummik atuuttumik peqarnissaa, aammalu qinnuteqartup tv-kkut aallakaatitanik aallakaatitsisarnissaa.

§ 17. Radio- tv-lu pillugit aalajangiisartut tv-kkut aallakaatitat aallakaatitassiornissamut tapiissuteqarfigineqarsimasut, aalajangiisartut nakkutilliisussaataitanerannut atatillugu taamungaannaq misissuiffigisarsinnaavaat.

Imm. 2. Tv-kkut aallakaatitat, tak. imm. 1, aallakaatitassiornissamut tapiissutininik qinnuteqaammut naapertuutinnginnerat paasineqarpat Radio- tv-lu pillugit aalajangiisartut tapiissutininik tunniussisarneq unitsissinnaavaat, tapiissutillu tunniunneqarsimasut tamakkiisumik ilaannakuusumilluunniit utertinneqarnissaat piumasarisinnaallugu.

§ 18. Radio- tv-lu pillugit aalajangiisartut tapiissutit pillugit aamma tapiissutininik unitsitsinissamik tapiissutininillu tamakkiisumik ilaannakuusumilluunniit utertitsinissamik aalajangiineri allaffeqarfitsigut oqartussaasunut allanut naammagittaalliutigineqarsinnaanngillat.

§ 19. Radio- tv-lu pillugit aalajangiisartut aallakaatitassiornissamut tapiissutitut kvartalimi tunniunneqanngitsoortut kvartalimi tulluuttumi aallakaatitassiornissamut tapiissutitut immikkoortitanut nuussavaat.

Imm. 2. Radio- tv-lu pillugit aalajangiisartut aallakaatitassiornissamut tapiissutitut tunniunneqanngitsoorsimasinnaasut, siunertanut § 2, imm. 1, nr. 4-mi taaneqartunut ukiumi tulluuttumi atugassatut ukiup naalernerani nuussavaat

Kattuffimmut tapiissutit

§ 20. Kattuffimmut tapiissutit kultureqarnermut pisorta qarfiimut aningaasaliissutigineqartarlutillu aqunneqassapput.

§ 21. Kultureqarnermut pisorta qarfiup kattuffimmut tapiissutininik STTK-mut tunniussinissaani, tak. § 2, imm. 1, nr. 3, piumasaqaatit makkua naammassineqarsimassapput:

1) STTK-p missingersuutai, anguniakkatut iliuusissatullu pilersaarutai kiisalu ilaasortaasa allattorsimaffiat kultureqarnermut pisorta qarfiup, qaammatisiutit malillugit ukiumi kattuffimmut tapiissutit attuumassuteqarfigisaanni kingusinnerpaamik ulloq 5. januar tigareersimassavai.

2) Aallakaatitsiviit ilaasortaasut tamarmik qaammatisiutit malillugit ukiumi qaangiuttumi aallakaatissimasaa tamarmiusut ukiumut naatsorsorneqarfiat kultureqarnermut pisorta qarfiup

kingusinnerpaamik ulloq 10. januar STTK-mit tigoreersimassavaa.

Imm. 2. Aallakaatitsiviit tamarmik aallakaatissimasaasa tamarmiusut imm. 1, nr. 2 malillugu ukiumut naatsorsorneqarfiat makkuninnga imaqaassaaq:

- 1) Aallakaatitsiviit ataasiakkaat nammineerlutik aallakaatitassiaat tamarmiusut minutsinngorlugit.
- 2) Taakkua imarisaasa, nunaqarfigisami nutaarsiassanut aallakaatitanullu innuttaasut oqaaseqarsinnaatitaaffigisaannut agguataakkat nalunaarneqarnerat.
- 3) Nammineerluni aallakaatitassiat oqaatsinut agguataarnerisa nalunaarneqarnerat.
- 4) Satellitradiup imaluunniit satellit-tv-p, kanalip aqqa nalunaarlugu, atugaanerata annertussusiata nalunaarneqarnera.

Imm. 3. Kattuffimmut tapiissutinut taakkua saniatigut piumasaqaataapput STTK-p nunaqarfigisami aallakaatitsivinnut ingerlaavartumik attaveqartarnissaa ilitseruinissamillu neqerooruteqartarnissaa, aammalu nunaqarfigisami aallakaatitsivinnut sammisumik pikkorissarnernik isumaginnittuunissaa.

§ 22. Kattuffimmut tapiissutit tunniunneqarnissaanni piumasaqaatit makkua atuupput:

- 1) Aallakaatitsiviit sorliit kvartalimi qaangiuttumi tunngaviusumik tapiissutinik tunineqarsimanerannik naatsorsuiffik aammalu aningaasat nunaqarfigisami radioqarfiit tv-qarfillu sulisuisa ilinniarteqqinneqartarnerannut ingerlaqqiffiusumillu ilinniartinneqarnerannut tapiissutit immikkoortinneqartunut kvartalimi qaangiuttumi nuunneqarsimasinnaasut naatsorsorneqarfiat kultureqarnermut pisorta qarfiup kingusinnerpaamik ulluni 10. april, 10. juli, 10. oktober aamma 10. januar STTK-mit tigoreersimasassavai.

- 2) Qaammatisiutit malillugit ukiumi qaangiuttumi ukiumoortumik naatsorsuutit siulersuisullu ukiumoortumik nalunaarutaat kingusinnerpaamik ukiumi tapiissutit attuumassuteqarfigisaanni ulloq 1. juni kultureqarnermut pisorta qarfimmu nassiunneqareersimassapput. Ukiumoortumik naatsorsuutit kukkunersiuisumit naalagaaffimmit akuerisaasumit imaluunniit nalunaarsorneqarsimasumit kukkunersiorneqarsimassapput, siulersuisunit tamarmiusunit atsiorneqarsimassallutik aammalu kukkunersiuisut oqaaseqaataat ilanngunneqarsimassapput.

- 3) Nunaqarfigisami aallakaatitsiviit sulisuisa ilinniartitaanerisa § 2, imm. 1, nr. 4-mi taaneqartut allaaserineqarneri, naliliivigineqarneri naatsorsuutitaallu ukiumoortumik naatsorsuutini nalunaarummilu immikkoortillugit allanneqarsimassapput.

§ 23. Kattuffimmut tapiissutit aningaasaliissutigineqartut atorineqarnerat kultureqarnermut pisorta qarfiup nakkutigissavaa.

Imm. 2. Kattuffimmut tapiissutit aningaasaliissutigineqarnerminni siunertaannit allaasunut atorineqartut paasineqarpat, kultureqarnermut pisorta qarfiup tapiissutit tunniunneqartarnerat unitsissinnaavaa kattuffimmullu tapiissutit tamakkiisumik ilaannakuusumilluunniit utertinneqarnissaat piumasarisinnaallugu.

Nunaqarfigisami radioqarfiit tv-qarfillu sulisuisa ilinniarteqqinneqartarnerannut ingerlaqqiffiusumillu ilinniartinneqarnerannut tapiissutit

§ 24. Nunaqarfigisami radioqarfiit tv-qarfillu sulisuisa ilinniarteqqinneqartarnerannut ingerlaqqiffiusumillu ilinniartinneqarnerannut tapiissutit STTK-mit aqunneqarlutillu tunniunneqartassapput aammalu aningaasanik §§-ini 11-mi 19-imilu taaneqartunik ilaneqartassallutik.

§ 25. Aningaasat § 2, imm. 1, nr. 4-mi taaneqartut atorlugit STTK-p nunaqarfigisami radioqarfiit tv-qarfillu sulisui ilinniarteqqinneqarluni ingerlaqqiffiusumillu ilinniartinneqarluni pikkorissarnerni peqataanissamut

neqeroorfigisassavai.

Imm. 2. Pikkorissarnerit imm. 1-imi taaneqartut kattuffimmit namminermit sulissutigineqarsinnaapput taannaluunniit aqqutigalugu ingerlanneqarsinnaallutik.

Imm. 3. Aningaasat imm. 1-imi taaneqartut pikkorissarnernut, sulisuusut tusagassiornermik sulinerminni piginnaasaannik, matumani aamma pitsaasumik tusagassiornissamik, tusagassiuutit iluani naatsorsuuserinerullu iluani piginnaasassanik annertusaasunut atorneqarnerussapput.

§ 26. Pikkorissarnernut § 2, imm. 1, nr. 4-mi taaneqartunut peqataanissaq STTK-mut ilaasortaanissamik piumasaqaatitaqanngilaq. Peqataanissamili piumasaqaataavoq pikkorissarnermi peqataasussap nunaqarfigisami aallakaatitsivimmuut aallakaatitsisinnaanermut akuersisummik peqartumut aammalu piffissap pikkorissarnermik pineqartumik ingerlatsiviusup nalaani radiukkuut tv-kkulluunniit aallakaatitanik aallakaatitsisartumut attuumassuteqartuunissaa.

§ 27. Ilinniarteqqinneqartarnernut ingerlaqqiffiusumillu ilinniartinneqarnernut tapiissutitut aningaasaliissutigineqartut atorneqarnerat kultureqarnermut pisorta qarfiup nakkutigissavaa.

Imm. 2. Tapiissutit aningaasaliissutigineqarnerminni siunertaannit allaasunut atorneqartut paasineqarpat, kultureqarnermut pisorta qarfiup tapiissutit tunniunneqartarnerat unitsissinnaavaa tapiissutillu tunniunneqarsimasut tamakkiisumik ilaannakuusumilluunniit utertinneqarnissaat piumasarisinnaallugu.

§ 28. Pikkorissarnernut § 2, imm. 1, nr. 4-mi taaneqartunut peqataanissamik qinnuteqaammik itigartitsineq ullormit aalajangiiffiusumiit sap.ak. 4-t qaangiutsinnagit kultureqarnermut pisorta qarfimmut allakkatigut naammagittaalliutitigineqarsinnaavoq.

Qinnuteqaatit il.il. tunniunneqartarneri suliarineqartarnerilu

§ 29. § 2, imm. 1, nr. 1 aamma 2 malillugit qinnuteqaatit suliarineqarnissaanni qinnuteqarfissatut immersugassap kultureqarnermut pisorta qarfimmit akuerisaasup immersorneqarnissaa piumasaqaatigineqarsinnaavoq.

Imm. 2. STTK-p tapiissutinik § 2, imm. 1, nr. 1-imi 3-milu taaneqartunik aqutsineranut atatillugu nalunaaruteqartarfissatut immersugassat kultureqarnermut pisorta qarfimmit akuerisaasut immersorneqartarnissaat piumasaqaatigineqarsinnaavoq.

§ 30. Tapiissutit § 2, imm. 1, nr. 1-imiit 4-mut taaneqartut pillugit qinnuteqaatinik naammagittaalliutinillu il.il. suliarinninnermi pisortat ingerlatsineranni suliassat suliarineqartarnerat pillugu Inatsisartut inatsisaat malinneqassaaq, matumani aamma suliassanik aalajangersimasunik suliarinninnermi nipangiussisussaataitanermut maleruagassat.

Pineqaatissiisarnerit

§ 31. Kinaluunniit tapiissutitut aningaasaliissutit aningaasaliissutigineqarneranni siunertaannit allaasunut atuisoq, tapiiffigineqarnissamik maleruagassanik unioqqutitsineq annertuppat arlaleriarlunuunniit unioqqutitsineruppat akiliisinneqarsinnaavoq.

Imm. 2. Aktieselskabi, anpartsselskabi, andelsselskabi, peqatigiiffik assigisaalluunniit imm. 1-imik unioqqutitsippat, ingerlatseqatigiiffik il.il. akiliisitsisummik taamaattumik akiliisussanngortinneqarsinnaavoq. Kommuni kommunilluunniit suleqatigiiffiat il.il. unioqqutitsippat kommuni kommunilluunniit suleqatigiiffiat il.il. aalajangersagaq aamma taanna naapertorlugu akiliisitsisummik taamaattumik akiliisussanngortinneqarsinnaavoq.

Atortuulerfia

§ 32. Nalunaarut una ulloq 1. januar 2005-imi atortuulerpoq.

Namminersornerullutik Oqartussat, ulloq 30. december 2004

Henriette Rasmussen

/

Lise Lennert Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut